

宋文鑑

第十二函

宋文鑑卷第七十二

箴

對皇太子問政箴

李至

箴

大寶箴

陳彭年

用材箴

田錫

文箴

孫何

省分箴

王隨

畏言箴

劉敞

讓箴

劉敞

步箴

蔡襄

勸講箴

趙師民

友箴

司馬光

視聽言動四箴

程頤

審已箴

王无咎

對皇太子問政牋

李至

伏奉手書猥賜下問夙夜尋繹喜與憂并何則至常人也識不足以經遠學不足以待問才不足以幹事智不足以周身而殿下目之爲碩儒曰可以發蒙號之爲端士曰可以延譽得不憂乎殿下忠孝之道貫於神明温文之德彰於天下而猶虛懷訪問思所以分君父之憂以元元爲念且曰一夫或致於向隅千里將疲於觀政此乃聖上有浸漬生靈之澤感動天地之德致使殿下興言及此實社稷之福而億兆之幸得不善乎然則愚者千慮必有一得若夫自古太子養德東宮不親外事唯問安侍膳而已固亦宜哉而黔庶之疾苦稼穡之艱難素未所覩自非生知之異天誘其衷莫得而知矣噫事有背經而合道時有適變而從宜是以五帝三王不相沿襲聖上知其然由是以浩穰之務獨命殿下總其綱要而躬決焉殿下復能欽若聖訓率由舊章馭吏民必以誠待參佐

必以禮慎命令必以儻察獄訟必以情恤鰥寡必以仁抑豪猾必  
以法杜讒佞必以正絕邪僻必以道有一于此猶為善政況兼是  
數者乎而猶曰奉車苟賜於司南為政何慙於拱北不亦過謙乎  
然則至雖不敏竊嘗讀易見羣爻稍過必有悔吝唯謙象獨亡是  
知謙之時義大矣哉願殿下守之而已勉之而已如此則何正言  
不入何正道不行若正言人而正道行則生民不泰未之有也政  
化不洽亦未之有也輒因問及輕肆狂瞽僭易之罪安敢逃焉

大寶箴

陳彭年

二儀之內最靈者人生民之中至大者君民既可畏天亦無親所  
輔者德所歸者仁恭已臨下輝光益新載籍斯在謀猷備陳內綏  
萬國外撫百蠻治亂所始言動之間觀之則易處之甚難由是先  
哲喻彼投艱苟能慮末乃可防閑審求逆耳無惡犯顏既庶而富  
教化乃施慈儉之政富庶之基鰥寡孤獨人之所悲發號施令宜  
先及之黃髮鮐背心實多知左右侍從何莫於茲瞻言百辟咸代

天工儻無虛授可建大中克彰謹束惟藉至公知人則哲視遠則  
聰才固難備道亦少同葑菲罔捨杞梓乃充不扶自直惟蓬在麻  
非揀莫見唯金在沙參備顧問必辨忠邪獻替以正裨益無涯自  
區草澤亦有國華訪此髦士可拒朋家三章之立庶民作程欽哉  
欽哉可以措刑七代之建寇孽是平本仁本義可以弭兵是謂齊  
禮亦曰好生有教無類自誠而明宗廟社稷饗之以恭宮室苑囿  
誠之在豐春蒐秋獮不廢三農擊石拊石用格神宗使人以悅乃  
克成功治國以政罔或不從濟濟多士用之有光硜硜小器謀之  
弗臧忠言致益豈讓膏粱六藝爲樂寧後笙簧任賢勿貳堯所以  
昌改過不悛湯所以王六合至廣萬彙攸多風俗靡一嗜慾相摩  
如馭朽索若防決河左契斯執六轡遂和導之以德民免嬰羅不  
懈于位俗乃偃戈先王之訓罔不咸然吾君之治亦取斯焉小心  
翼翼終日乾乾三靈降鑒百祿無愆由茲率土永戴先天巍巍洪  
業億萬斯年

用材箴

田錫

天運四時地生萬類以覆以載各得其位天地猶爾人胡求備堯以仁化舜以孝理稷專播穀禹務導水聖賢猶然人胡求全是以有才者不必有德有德者不必有言與人結交能護其短掩短錄長交卽悠遠任人之職能從其長錄長掩短邦實阜昌無好之則忘其不肖無惡之則忘其允臧執心至公取其所彊馬或奔踈乃致千里士有跡弛可任以事一善可稱則勿求具美然後會眾善以涖庶官民實攸暨

文箴

孫何

堯制舜度絲今亓古周作孔述炳星煥日是曰六經爲世權衡萬象森羅五常混并游夏之徒得麤喪精空傳其道無所發明後賢誰嗣惟軻泊卿仁門義奧我有典刑聖人觀之猶足化成羸侯劉帝屈指西京仲舒賈誼名實絕異相如子長才智非常較其工拙互有否臧揚雄歛焉刷翼孤翔可師數子儻文之場東漢而下寂

無雄霸疊疊建安格力猶完當途之後文失其官家攘往跡戶掠  
陳言陵夷怠惰至于江左輕淺淫麗迭相唱和聖心經體盡墜于  
地千詞一語萬指一意縫煙綴雲圖山畫水駢枝儷葉顛首倒尾  
治亂莫分興亡不紀齊頓梁絕陳傾隋圯奕奕李唐木鐸再揚文  
之紀綱斷而更張鉅手魁筆磊落相望凌轢百代直趨三王續典  
紹謩韓領其徒還雅歸頌杜統其眾士德既衰文復喧卑制誥之  
俗儕于四六風什之訛隣于謳歌懷經囊史孰遏頽波出入五代  
兵戈不稱天佑斯文起我大君蒲帛詔聘鴻碩紛綸邪返而正漓  
澄而滄凡百儒林宜師帝心語思其工意思其深勿聽淫哇喪其  
雅音勿視彩飾亡其正色力樹古風坐臻皇極無俾唐文獨稱往  
昔賤臣司箴敢告執策

省分箴

王隨

夕晦晝明乾動坤靜物稟乎性人賦於命貴賤賢愚壽夭衰盛諒  
夫自然冥數潛定蕙生數寸松高百尺水潤火炎輪曲轅直或金

或錫或玉或石茶苦薺甘烏黔鷺白性不可易體不可移握苗則  
悴續鳧乃悲巢者罔穴泳者寧馳竹柏寒茂桐柳秋衰闕里泣麟  
傅巖肖象馮衍空歸千秋驟相健羨勿用止足可尙處順安時吉  
祿長享

畏言箴

劉敞

吾甚畏言言可畏也而不能默然吾言惘惘倡而後和人猶以爲  
過吾言繩繩譽而不訾人猶以爲非非吾言之畏維人之多忌非  
吾之不能默然而人實多言若是者其止乎其已乎其勿問而唯  
乎譬之於物其爲石不爲水乎水之滔滔往而不來有陷而淵有  
壅而洄有激而在山椒曰水哉水哉

讓箴

劉敞

資政富公始讓樞密直學士又讓翰林學士又讓樞密副使凡三  
讓所讓益尊所守益堅粲然有古人之遺風故作讓箴以矯世礪  
俗云

讓如何其讓非爲名欲先信吾道於天下氓讓如何其讓非爲利  
欲天下之人咸信吾義世有常患患其欲速枉尺直尋卒附于辱  
世有常患患其在得辭小受大卒沒于直公皆拂之公旣述之啟  
之闢之俾世則之曰吾豈惡富貴富貴維德人以厚己我以厚國  
時豈無人昏夜乞憐縱或得之何如其賢時豈無人乘機射利縱  
或得之何如其智嗟此富公直哉優優孰眎富公而能勿羞孰持  
富公攜手以游昔宋考父三命益恭嗟此富公千世與同作詩載  
美穆如清風

步箴

蔡襄

有足兮動涉坦夷有心兮何由險巇足非有慮兮心役之爲用心  
如足兮蠻貊行之

勸講箴

趙師民

若帝之元於稽古先將以其道格于皇天格天如何謹徽舊典惟  
聖時憲乃克盡善在帝宅中亮章溫雅將以其文化成天下化成

如何順考正道席上之珍茲惟國寶天下有帝體元初制非先聖  
之舊章不足以秉同文而執司契日中爲市以奠四方非先聖之  
遺法不足以舉大義而正國常帝度其身郁郁乎文彰禮施樂以  
副皇墳帝出其言穆穆厥聲含仁吐義式諧羣情自天降祥我民  
既康不觀于經懼先猷之寢忘四夷放命有嚴誓合不觀于經慮  
大功之未定無以方隅之多事而謂經籍之宜息虞舜征苗誕敷  
文德無謂宸居之至尊而忽右文之爲貴岐昌造周天經地緯無  
以陳久之可替乃謂迂闊而難行先哲之言雖無老成無譏鄙主  
之窶陋而略愚儒之淺昧先師之談不以人廢無以世治之或殊  
而謂陳言之可悔商弼之諫事不師古無玩歲月之其除而謂寸  
陰之已速周王之戒惟日不足有以見世主之御圖或萬機紛然  
不酌于古道則風祀有時而弗宣有以見人君之居極或百度差  
忒不斷于古義則權制有時而弗克昔令王之經世必去害而稱  
利明主觀其書可以效財成于萬事昔賢臣之事君有謀猷而必

陳明主觀其書可以示軌度于羣倫正朝之上法宮之中非贊襄  
雅奧不足以興嗜慾于清躬神麗之游光明之處非啟迪深厚不  
足以立正事於古語是故可以上文可以立武可以奉天地可以  
爲宗主匪止玩其辭而釋其詰可以觀道可以對萬物可以臨兆  
人不止明其舊而知其新靖恭乙夜總覽羣書夫聖人之至德何  
以加於從容晏朝紬繹微旨非天下之至精孰能與此臣初聞始  
元之間儒風寢還侍問之臣賜以清閒臣復觀永平之烈經術未  
缺羣儒議前稱制以決桑乾之后來自幽陵束髮右衽斯文有承  
金陵之君越于夷裔雖則講習其文已敝李唐之興賢君挺生正  
觀初治開元旣平東壁羣山儒宗墨卿侍從之臣官有佳名在我  
太祖神武披攘親駕辟靡真儒有光有赫太宗文武並運經臣師  
師以承帝問於穆眞皇講求多藝以其人文發爲盛際陛下卽位  
纂承天祿肇開二閣以延儒服西臨邇英北啟延義瞻仰皇明彌  
綸聖智成天下之務昔游焉而穆清陳天下之謨須於茲而講肆

帝坐甚明天章不祕願以議道願以求治下臣執經敢告中侍

友箴

司馬光

余何遊乎余將遊聖人之門仁人之里非聖不師非仁不友可乎  
未可不若遊眾人之場聞善而遷觀過而改

視聽言動四箴

程頤

顏子問克己復禮之目夫子曰非禮勿視非禮勿聽非禮勿言非  
禮勿動四者身之用也由乎中而應乎外制於外所以養其中也  
顏子事斯語所以進於聖人後之學聖人者宜服膺而勿失也作  
四箴以自警云一作因箴以自警言

視箴

心兮本虛應物無跡操之有要視之為一作為之則蔽交於前其中則  
遷制之於外以安其內克己復禮久而誠矣

聽箴

人有秉彝本乎天性知誘物化遂亡其正卓彼先覺知止有定閑

邪存誠非禮勿聽

言箴

人心之動因言以宣發禁躁妄內斯靜專矧是樞機興戎出好吉  
凶榮辱惟其所召傷易則誕傷煩則枝已肆物件出悖來違非法  
不道欽哉訓辭

動箴

哲人知幾誠之於思志士厲行守之於爲順理則裕從欲惟一作爲  
危造次克念戰兢自持習與性成聖賢同歸

審已箴

王无咎

汝曰有德汝未大成汝之有過傷德蓋輕聖能恕汝猶曰汝美眾  
人弗逮知慕而已恕汝不知慕汝輒愉汝不自反卒比於愚愚不  
可比汝孰宜懼聖人之恕眾人之慕

宋文鑑卷第七十三

銘

財貨銘

李瑩

續座右銘

李至

武關銘

胡旦

彭祖觀井圖銘

陳靖

門銘

呂夷簡

几銘

陳堯佐

几銘

晏殊

擊蛇笏銘

石介

槃水銘

司馬光

醫銘

呂誨

明州新修刻漏銘

王安石

布衾銘

范純仁

西銘  
東銘

鼎硯銘

鄧公硯銘

天硯銘

文與可琴銘

徐州蓮華漏銘

三槐堂銘

擇勝亭銘

九成臺銘

端石硯銘

邁硯銘

洪州分寧縣藏書閣銘

游藝齋銘

張載

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

黃庭堅

黃庭堅

研銘

黃庭堅

黃樓銘

陳師道

克己銘

呂大臨

蜀舍銘

劉跂

大圓硯銘

晁補之

座右銘

鄒浩

家藏古硯銘

唐庚

古硯銘

崔鷗

財貨銘

李瑩

暇日讀夢書則曰夢虺夢糞者獲財因以銘之

財貨將至夢寐可尋或穢或虺乃玉乃金穢可親歟虺可翫歟敢

獻斯銘以激貪夫

續座右銘

李至

崔子玉為座右銘白樂天亦為座右銘檢身之道幾乎殫矣予嘗

冥心讜坐自思所爲慮向之益友以予位著不我規也因疏其所  
得亦命爲座右銘聊以自勉其辭曰

短不可護護則終短長不可矜矜則不長尤人不如尤己好圓不  
如好方用晦則天下莫與汝爭智撝謙則天下莫與汝爭強多言  
者老氏所戒欲訥者仲尼所臧妄動有悔何如靜而勿動太剛則  
折何如柔而勿剛吾見進而不已者敗未見退而自足者亡爲善  
則遊君子之域爲惡則入小人之鄉吾將書紳帶以自警刻盤盂  
而遏防豈如長存於座右庶夙夜之不忘

武關銘

胡旦

南條東走自雍而荆呀爲武關作扞秦城秦人東顧六國無主漢  
氏西來子嬰爲虜彼此鯨鯢更相豺虎吁嗟強秦曾無守禦秦而  
爲漢漢復如秦劉氏不綱莽賊造新嚴嚴武關前人後人我開則  
興我閉則亂一開一閉今古同貫王者邦畿守在四夷禮義干櫓  
道德藩籬遠人不服文德來之化旣無外何以關爲